

**Uunga siunnersuut: Inatsisartut isummerfigisassaattut siunnersuut Naalakkersuisut  
peqquneqassasut meeqqat atuarfiannut**

**tulluussakkamik inuit pisinnaatitaaffii pillugit atuartitsissutissanik kalaallisut  
ataqatigiissumik sananissamik aammalu taassuma saniatigut suliniutigineqassasoq,  
meeqqat atuarfianni atuartitsisut inuit pisinnaatitaaffii pillugit ilinniartitsinissamut  
pikkorissarneqassasut**

*Inatsisartunut ilaasortaq Nivi Olsen, Demokraatit*

pillugu

**Kultureqarnermut, Ilinniartitaanermut, Ilisimatusarnermut Ilageeqarnermullu  
Ataatsimiititaliap**

**Siunnersuutip aappassaanneerpeqarnerani**

**ISUMALIUTISSIISUTAA**

Ataatsimiititaliap suliaqarnermi makkuninnga inuttaqarpoq:

Inatsisartunut ilaasortaq Sofia Geisler, Inuit Ataqatigiit, siulittaasoq  
Inatsisartunut ilaasortaq Doris Jakobsen Jensen, Siumut, siulittaasup tullia  
Inatsisartunut ilaasortaq Mariia Simonsen, Inuit Ataqatigiit  
Inatsisartunut ilaasortaq Nivi Olsen, Demokraatit  
Inatsisartunut ilaasortaq Mette Arqe-Hammeken, Naleraq

UKA2021-imi 10. November 2021-mi siullermeernerup kingorna siunnersuut ataatsimiititaliap misissorpaa.

**1. Siunnersuutip imarisaa siunertaalu**

Meeqqat atuarfianni atuartunut naleqqussagaasunik inuit pisinnaatitaaffii pillugit ilinniusiortoqarnissaanik Naalakkersuisut peqquneqassasut siunnersuusiortup uani siunnersuummi kissaatigaa. Kalaallit Nunaannut tulluussakkamik ilinniusiassat naleqqussarneqassapput. Inuit pisinnaatitaaffii pillugit ilinniartitsisut tulluuttunik piginnaangorsarneqarnissaat siunnersuutigineqartumi aamma siunertaavoq.

**2. Inatsisartuni siunnersuummik siullermeerinnineq**

UKA2021-mi november 2021-mi siunnersuut siullermeerneqarpoq. Siunnersuut appassaanneerpeqannginnermini ataatsimiititaliamut innersuunneqarpoq.

### 3. Siunnersuummik ataatsimiititaliap suliarinninnera

Siullermeerneqarnermini siunnersuutigineqartumi tamakkiinerusumik sammineqartoq iluarisimaarneqartoq ataatsimiititaliap maluginiarpaa. Siunnersuutigineqartumullu partiinit assigiinngitsunik isummersortoqarpoq, Inuit Ataqatigiit Nalerarlu Naalakkersuisut allannguutissamik siunnersuutaannut tapersiisut. Demokratit Siumullu siunnersuuteqartup siunnersuutaa taperserpaat, Atassut allannguutissamik siunnersuummik siunnersuuteqartoq.

#### 3.1. Allannguutissatut siunnersuut

Siunnersuutip siullermeerneqarnerani Naalakkersuisut allannguutissamik siunnersuummik saqqummiussaqrput ima oqaasertalerneqartumik:

**“Meeqqat atuarfiannut Kalaallit Nunaannut tulluussakkanik inuit pisinnaatitaaffii pillugit atuartitsissutinik kalaallisuunik ilnniusiorneq suli salliutinneqarnissaanik kommunillu suleqatigalugit meeqqat atuarfianni ilnniartitsisut inuit pisinnaatitaaffii pillugit ilnniartitsinissamut piginnaasaat qaffassarniarlugit pikkorissarneqarnissaanik Naalakkersuisut suliniuteqaqqullugit peqquneqarnissaanik Inatsisartut aalajangiiffissaattut siunnersuut”**

Naalakkersuisut ilnniartitsissutinik suliaqarnissaanik peqquneqassanngitsut kisiannili inuit pisinnaatitaaffii pillugit ilanngunneqartussanik tulleriiaarinerit suliarisussaagaat siunnersuutigineqartup allannguutissatullu siunnersuutip assigiinngissutigigaat ataatsimiititaliap maluginiarpaa. Meeqqat atuarfianni ilnniartitsisut inuit pisinnaatitaaffii pillugit tulluuttunik piginnaanngorsarneqarnissaat anguniarlugu Naalakkersuisut kommuninik suleqatiserinninnerat ataatsimiititaliap maluginiarpaa. Siunnersuutigineqaqqaartup qulequtaani taasissutigineqartussami suleqateqarnissaq oqaatigineqanngilaq.

Siunnersuutip siullermeerneqarnerani Atassut allannguutissamik siunnersuummik saqqummiussaqrtoq ataatsimiititaliamittaaq maluginiarneqarpoq:

**“Inatsisartut isummerfigisassaattut siunnersuut Naalakkersuisut peqquneqassasut meeqqat atuarfiannut tulluussakkamik inuit pisinnaatitaaffii, inuup ineriartorneranut inuussutissarsiornermullu atuartitsineq pillugit atuartitsissutissanik kalaallisut ataqatigiisumik sananissamik aammalu taassuma saniatigut suliniutigineqassasoq, meeqqat atuarfianni atuartitsisut inuit pisinnaatitaaffii pillugit, inuttut ineriartorneq inuussutissarsiorneq aningaasarsiornerlu sammivigalugit ilnniartitsinissamut pikkorissarneqassasut”.**

Allannguutissatut siunnersuummi inuussutissarsiutit aningaasaqarnerlu pingaartinneqarlutik ilanngunneqarput, taamaattorli siunnersuutaaqqaartumut assingusuusoq ataatsimiititaliap maluginiarpaa.

### 3.2. Ilinniutissanik toqqaanissamut kiffaangissuseqarneq

Atuarfik pillugu inatsimmi § 18 naapertorlugu atuartsinerup pilersaarusioneqarnera, tassunga ilanngunneqarlutik ilinniartitsissutit atuartsissutini tamani atuarfiup siunertaanut tamatigut naammassinnissimanissaat allassimasoqarpoq. Tamatuma saniatigut Ilinniartitsinissamut atortut akuerineqarnissaat<sup>1</sup> atuarfinni siulersuisuinit akisussaaffigineqaat. Atuartsinermi atortut suut atorsinnaanersut ilinniartitsisut ataasiakkaat akisussaaffigigaat ataatsimiititaliap erseqqissaatigaa. Atuartsissutit ineriartortinneqarsinnaanerat akuerineqartullu ilinniartitsinermi atorineqarnissaat taamaalilluni qulakkeerneqarsinnaangilaq.

Meeqqat pillugit Isumaqatigiissut tunngavigalugu meeqqat pisinnaatitaaffi pillugit suliniaqatigiiffiup MIO-p, Nakuusap UNICEF-illu Kalaallit Nunaannut tulluussakkamik inuit pisinnaatitaaffi pillugit saqqummiussaqaarsimasut Naalackersuisut akissuteqaamminni allapput.

### 3.3. Inuit pisinnaatitaaffi pillugit ilinniartitsineq

Inuit pisinnaatitaaffi pillugit Institutip 2021-mi Ilisimatusarfimmik aamma Inuit pisinnaatitaaffi pillugit siunnersuisoqatigiinnik ukiuni sisamani atuuttussamik inuiaqatigiinni atugarissaarnermut tunngasunik suliaqartunik, assersuutigalugu isumaginninnermik siunnersortinik ilinniartitsisunillu piginnaangorsaannissamik ineriartortitsinissamik suleqatigiinnissamik isumaqatigiissuteqartut ataatsimiititaliap maluginiarppaa. Kalaallit Nunaannut naleqqussakkanik qarasaasiakku ilinniutinik pikkorissaanernillu ingerlatsinissamik ineriartortitsinissamik suleqatigiinnissamik isumaqatigiissut ilaatigut imaqartinneqartoq nalunaarusiami ”*Inuit Pisinnaatitaaffi Ukkataralugit 2020-21-mi Inatsisartunut nalunaarut*”-mi atuarneqarsinnaavoq. Inuit pisinnaatitaaffi pillugit suliaqartunut amerliartortunut, uani ilaatinneqarlutik ilinniartitsisut, qaammaasaqarnerulernissaanut aqquataasoq pingaaruteqartoq ataatsimiititaliap isumaqarpoq.

Atuarfik pillugu inatsisip siunertaani<sup>2</sup> allanngortitsisoqarnissaa Inuit pisinnaatitaaffi inuit innersuussisoqartoq nalunaarusiami tassani Inuit Pisinnaatitaaffi pillugit Instituti kaammattuisoq ataatsimiititaliap maluginiarppaa.

Atuarfinni nikeriarfinni pingasuni tamani inuttut ineriartornermi inuiaqatigiilerinermilu atuarnermi inuit pisinnaatitaaffi anguniagassatut ilanngunneqarsimasut Naalackersuisut akissuteqaamminni allapput.

Atuarfiup ilinniagassani suliaqarfinnilu tamani<sup>3</sup> nikeriarfiit siunertaat pillugit nalunaarummi

<sup>1</sup> Atuarfik pillugu Inatsisartut inatsississaattut siunnersuut nr. 15, 3. december 2012-imeersoq, § 47, imm. 6

<sup>2</sup> Atuarfik pillugu Inatsisartut inatsississaattut siunnersuut nr. 15, 3. december 2012-imeersoq, kapitali 2

<sup>3</sup> Atuarfimmu atuartsissutini atuartsissutinilu qanitariissuni alloriarfiit siunertaat kiisalu atuartsissutit siunertaat ilikkagassatullu anguniagassat pillugit Namminersornerullutik Oqartussat nalunaarutaat nr. 16, 24. juuni 2003-meersoq

inuit pisinnaatitaaffii toqqaannartumik ilanngunneqarsimanngitsut kisiannili anguniagassatut immikkut taanngikkaluarlugit ilanngunneqartut ataatsimiititaliamit ilisimaneqarpoq.

Atuarfik pillugu inatsimmut allannguutissamik Naalakkersuisut UKA2021-saqqummiusaqarput. Taanna akuerineqarpoq Akuerineqarnerata malitsigisaanik nikeriarfiit siunertaat, ilinniagassani anguniagassat suliaasaqarfinnilu tamani anguniagassat pillugit nalunaarummi allannguisoqartariaqassaaq. UKA2021/134-imut isumaliutissiisummi ataatsimiititaliap apeqqutaanut Naalakkersuisut akissuteqaat ataatsimiititaliamit innersuussutigineqarpoq:

*”Ilinniartitaanermut Aqutsisoqarfiup aallartereerpaa atuartitsissutissanut siunertanik ilikkagassanilu angusassanik ilinniartitsissutini suliaasaqarfinnilu tamani atuuttussanik suliaqarneq. Atuartitsissutini siunertat ilikkagassanilu anguniakkat maanna atuartitsissutini - fagini – inuiaqatigiilerinermilu, ullumikkut oqaluttuarisaanermik aamma ilaqartumi tunngaviusussat, taamaaliornikkullu atuartitsissutit fagit immikkoortiterneri ersarinnerulersillugit.”*  
(Ataatsimiititaliap erseqqissaanera).

Qulaani allassimasut tunngavigalugit ilinniagassani ilikkagassatullu anguniagassat siunertaasa nalilersorneranni inuit pisinnaatitaaffii meeqqat pisinnaatitaaffisalu ilanngunneqarnissaat pillugu periarfissanik misissuisoqarnissaa ataatsimiititaliap Naalakkersuisunut kaammattuutigaa.

#### **4. Siunnersuutip aningaasatigut kingunerisassai**

Inatsisartut Suleriaasianni § 33 imm. 1-imi allassimavoq siunnersuutip piviusunngortinneqarnissaanut aningaasatigut allaffissornikkullu kingunerisassai siunnersuutip tunngavilersuutaani allaaserineqassasut.

Siunnersuutip piviusunngortinneqarnissaanut aningaasatigut kingunerisassai ilanngunneqarsimammata ataatsimiititaliamit tusaatissatut tiguneqarpoq. Naalakkersuisuts § 37-mut akissuteqaamminni aningaasatigut kingunerisassatut missingusiaat siunnersuuteqartup atorpa.


*“Nalunarpog aningaasatigut kingunissaa eqqoriassallugu atuartitsissutissanik nutaanik ineriartortitsinermi, tassani apeqquataajumaarmat qanoq annertutiginera aamma assilissatigut atortussat eqqarsaatigalugit, kiisalu atortussat naqqaniik ineriartortinnissaat eqqarsaatigalugu, imaluunniit allagartalersuisoqassanersoq atortussat pioreersut atorlugit. Assersuutigalugu Ilinniartitaanermut Pisortaqarfimmit Ilinniusiorfik paasisutissiivoq, atuartitsissutissanik 43-nik quppernilinnik ineriartortitsineq akeqassasoq 272.000 kr.-inik. Tassani ilaavoq atuakkiortumut, ilusilersuisumut, grafiker-imut, naqiterivimmum, nutserinermum*

*assigisaannullu aningaasartuutit. Taassuma saniatigut redaktør-ip piffissamik sulinermini atuinissaa.”*


##### **5. Ataatsimiititaliap inassuteqaataa**

Naalakkersuisut allannguutissatut siunnersuutaat akuerineqassasaq ataatsimiititaliap isumaqatigiittup inassutigaa.

Taamatut oqaaseqarluni isumaliutissiissummilu allassimasutut paasinnillutik matumuuna siunnersuut ataatsimiititaliap aappassaaniigassanngortippaa.



Doris Jakobsen Jensen  
Siulittaasup tullia



pva.

Hans Aronsen



Harald Bianco



Nivi Olsen



Mette Arge-Hammeken